

১০
১০৪৮৮

রেজিস্টার্ড নং ডি এ-১

বাংলাদেশ



গেজেট

অতিরিক্ত সংখ্যা

কর্তৃপক্ষ কর্তৃক প্রকাশিত

বুধবার, অক্টোবর ৫, ২০০৫

গণপ্রজাতন্ত্রী বাংলাদেশ সরকার
বাণিজ্য মন্ত্রণালয়
রগুনী-৩ শাখা
প্রজ্ঞাপন

তারিখ, ৩১ ভাদ্র ১৪১২/১৫ সেপ্টেম্বর ২০০৫

নং বাম/র-৩/প্রকল্প/২৫(২৪)/২০০৪/৩২৩—যেহেতু বাংলাদেশের চা খাতের উন্নয়নের লক্ষ্যে উত্তরবংগে (বৃহত্তর রংপুর ও দিনাজপুর জেলা) চা বাগান প্রতিষ্ঠা, চা চাষাবাদ সংক্রান্ত কার্যক্রম তদারকি করা, ক্ষুদ্র চা উৎপাদনকারী (স্মল টি প্রোয়ার), ক্ষুদ্রায়তন চা খামার (স্মল টি হোল্ডিং) ও কারখানাবিহীন চা বাগানসমূহের উৎপাদিত কাঁচা চা পাতা প্রক্রিয়াজাতকরণের নিমিত্তে বটলীফ চা কারখানা স্থাপনের অনুমতি প্রদান এবং অননুসঙ্গিত কারখানা পরিচালনা সংক্রান্ত কার্যক্রম তত্ত্বাবধানের নিমিত্তে নীতিমালা (Policy) প্রণয়ন করা সমীচীন ও প্রয়োজনীয়;

সেহেতু এতদ্বারা নিম্নরূপ নীতিমালা (Policy) প্রণয়ন করা হইল :

১। শিরোনাম ও প্রয়োগ।—(১) এই নীতিমালা বটলীফ চা কারখানা স্থাপন নীতিমালা নামে অভিহিত হইবে।

(২) ইহা বৃহত্তর রংপুর ও দিনাজপুর জেলায় প্রযোজ্য হইবে।

২। সংজ্ঞা।—বিষয় বা প্রসংগের পরিপন্থী কিছু না থাকিলে, এই নীতিমালা:

(ক) “কারখানা” অর্থ বটলীফ চা কারখানা;

(খ) “কমিটি” অর্থ নীতি ৫(২) এর অধীন গঠিত কারখানা তত্ত্বাবধায়ক কমিটি;

(গ) “বোর্ড” অর্থ বাংলাদেশ চা বোর্ড;

(ঘ) “ব্যক্তি” অর্থে কোম্পানী, সমিতি, অংশীদারী কারবার, সংবিধিবদ্ধ বা অনবিধিত সংস্থা বা উহাদের প্রতিনিধিও অন্তর্ভুক্ত হইবে।

৩। কারখানা স্থাপন।—(১) বোর্ডের পূর্বানুমোদনক্রমে নিজস্ব অর্থায়নে বা ব্যাংক সহায়তার মাধ্যমে যে কোন ব্যক্তি বটলীফ চা কারখানা স্থাপন করিতে পারিবে।

(২) আর্থিক সংগতি ও পূর্বঅভিজ্ঞতাসম্পন্ন ব্যক্তিকে কারখানা স্থাপনের অনুমতি দেওয়ার ক্ষেত্রে অগ্রাধিকার প্রদান করা হইবে।

(৯১২৭)

মূল্য : টাকা ৪.০০

৪। কারখানা স্থাপনের ক্ষেত্রে অনুসরণীয় নির্দেশাবলী।—(১) ক্ষুদ্রায়তন চা উৎপাদনকারী বা কারখানাবিহীন চা বাগানগুলোর কেন্দ্রস্থলে কারখানা স্থাপন করিতে হইবে এবং উৎপাদনকারী এলাকার প্রয়োজনীয় অবকাঠামোগত সুবিধাদি, যেমন—যাতায়াতের রাস্তা, বিদ্যুৎ সংযোগ, পানি ও জ্বালানী প্রাপ্যতা, ইত্যাদি বিদ্যমান থাকিতে হইবে।

(২) কারখানা ভবন ও যন্ত্রপাতি গুণগতমান সম্পন্ন এবং স্বাস্থ্য সম্মত হইতে হইবে।

(৩) কোন আবাসিক এলাকায় কারখানা স্থাপন করা যাইবে না এবং কারখানা স্থাপনের ফলে 'মহাঘাতে পরিবেশের ভারসাম্য নষ্ট না হয় তাহা নিশ্চিত করিতে হইবে।

(৪) কারখানা স্থাপনের পূর্বে বাংলাদেশ পরিবেশ সংরক্ষণ আইন, ১৯৯৫ (১৯৯৫ সনের ১ নং আইন) এবং পরিবেশ সংরক্ষণ বিধিমালা, ১৯৯৭ এর বিধান অনুসারে পরিবেশ অধিদপ্তর কর্তৃক পরিবেশগত ছাড়পত্র গ্রহণ করিতে হইবে।

৫। কারখানা স্থাপনের ক্ষেত্রে আবেদনের নিয়মাবলী।—(১) কারখানা স্থাপনের জন্য বোর্ডের চেয়ারম্যান বরাবরে আবেদন করিতে হইবে।

(২) আবেদনপত্রে নিম্নবর্ণিত তথ্যাবলী সন্নিবেশ করিতে হইবে; যথাঃ—

- (ক) আবেদনকারীর নাম ও পূর্ণ ঠিকানা;
- (খ) আবেদনকারীর ধরন (ব্যক্তি/লিমিটেড কোম্পানী/অংশীদারী কারবার/সমবায় প্রতিষ্ঠান);
- (গ) আবেদনকারীর জাতীয়তা;
- (ঘ) প্রস্তাবিত কারখানার অবস্থান;
- (ঙ) প্রস্তাবিত কারখানার ধরন (সিটিসি/অর্থোডক্স);
- (চ) প্রস্তাবিত কারখানার উৎপাদন ক্ষমতা;
- (ছ) প্রস্তাবিত কারখানা প্রতিষ্ঠার জন্য অর্থায়নের উৎস;
- (জ) যে এলাকার চা পাতা প্রক্রিয়াকরণ করা হইবে সেই স্থানের নাম;
- (ঝ) যে জমির উপর কারখানা স্থাপন করা হইবে উহার পরিমাণ।

(৩) নপত্রের সহিত নিম্নবর্ণিত কাগজপত্র সংযুক্ত করিতে হইবে, যথাঃ—

- (ক) আবেদনকারীর জাতীয়তার সপক্ষে ইউনিয়ন পরিষদ, পৌরসভা বা সিটি কর্পোরেশনের চেয়ারম্যান বা, ক্ষেত্রমত, মেয়র কর্তৃক প্রদত্ত প্রত্যয়ন পত্র;
- (খ) আবেদনকারী কোম্পানী হইলে উহার সংঘবিধি (Articles of Association) এবং সংঘ-স্মারক (Memorandum of Association) এর সত্যায়িত অনুলিপি;
- (গ) আবেদনকারী অংশীদারী প্রতিষ্ঠান বা সমবায় প্রতিষ্ঠান হইলে অংশীদারী চুক্তিপত্রের সত্যায়িত অনুলিপি এবং সমবায় প্রতিষ্ঠানের নিবন্ধনপত্রের সত্যায়িত অনুলিপি;
- (ঘ) আবেদনকারীর আর্থিক সচ্ছলতার পক্ষে ব্যাংক সলভেন্সী সার্টিফিকেট;
- (ঙ) যে জমির উপর প্রস্তাবিত কারখানা স্থাপন করা হইবে উহার মালিকানা সংক্রান্ত দলিলপত্রের সত্যায়িত অনুলিপি;
- (চ) পরিবেশ অধিদপ্তরের পরিবেশগত ছাড়পত্র।

৬। কারখানার কার্যক্রম তত্ত্বাবধান।—(১) বোর্ড কর্তৃক গঠিত কারখানা তত্ত্বাবধায়ক কমিটির মাঝে বোর্ডের নিয়ন্ত্রণাধীনে কারখানার কার্যক্রম তত্ত্বাবধান করা হইবে।

(২) কমিটি নিম্নরূপ সদস্য সমন্বয়ে গঠিত হইবে, যথাঃ—

- (ক) বোর্ডের সদস্য (গবেষণা উন্নয়ন) অথবা চেয়ারম্যান কর্তৃক মনোনীত কোন কর্মকর্তা, যিনি ইহার সভাপতিও হইবেন;
- (খ) চা গবেষণা ইনস্টিটিউটের একজন প্রতিনিধি;
- (গ) প্রকল্প উন্নয়ন ইউনিটের একজন প্রতিনিধি;
- (ঘ) বাংলাদেশ কৃষি ব্যাংকের একজন প্রতিনিধি;
- (ঙ) রাজশাহী কৃষি উন্নয়ন ব্যাংকের একজন প্রতিনিধি;
- (চ) কারখানা মালিক/কারখানাবিহীন ক্ষুদ্রায়তন চা বাগানের একজন প্রতিনিধি;
- (ছ) স্মল হোল্ডার চা উৎপাদনকারীদের একজন নির্বাচিত প্রতিনিধি;
- (জ) স্মল প্রোয়ার চা উৎপাদনকারীদের একজন নির্বাচিত প্রতিনিধি;
- (ঝ) বোর্ডের একজন প্রতিনিধি, যিনি ইহার সদস্য সচিবও হইবেন।

৭। কমিটির সভা ও সিদ্ধান্ত।—(১) কমিটি উহার সভার কার্যপদ্ধতি নির্ধারণ করিতে পারিবে।

(২) কমিটির সভা উহার সভাপতি কর্তৃক নির্ধারিত স্থান ও সময়ে অনুষ্ঠিত হইবেঃ

তবে শর্ত থাকে যে, প্রতি ৩ (তিন) মাসে কমপক্ষে একটি সভা অনুষ্ঠিত হইবে এবং প্রয়োজনে অন্য যে কোন সময়ও সভা আয়োজন করা যাইবেঃ

আরো শর্ত থাকে যে, কমিটির সভায় ক্ষুদ্র চা চাষী প্রতিনিধিগণের উপস্থিতি নিশ্চিত করিবার জন্য কারখানা এলাকা বা সংশ্লিষ্ট জেলা সদরে কমিটির সভা অনুষ্ঠানের ব্যবস্থা গ্রহণ করিতে হইবে।

(৩) কমিটির সভাপতি কমিটির সকল সভায় সভাপতিত্ব করিবেন এবং তাহার অনুপস্থিতিতে সভাপতি কর্তৃক, সদস্যদের মধ্য হইতে, মনোনীত কোন সদস্য সভায় সভাপতিত্ব করিবেন।

(৪) অন্যান্য ছয়জন সদস্যের ভোটে কমিটির সভায় সিদ্ধান্ত গৃহীত হইবে এবং কমিটির সভার বিষয় ও সিদ্ধান্তসমূহ প্রতিবেদন আকারে বাণিজ্য মন্ত্রণালয় ও বোর্ডকে অবহিত করিতে হইবে।

৮। কমিটির কার্যাবলী।—কমিটির কার্যাবলী হইবে নিম্নরূপ, যথাঃ—

- (ক) ক্ষুদ্র চা চাষী বা কারখানাবিহীন চা বাগান কর্তৃক উৎপাদিত কাঁচা চা পাতার জন্য প্রত্যেক বৎসরের বিক্রয়মূল্য নির্ধারণ;
 - (খ) ক্ষুদ্র চা চাষীদের চা পাতা পরিমাপ করিয়া কারখানা কর্তৃপক্ষকে প্রদানের জন্য সুবিধাজনক স্থানসমূহ নির্ধারণ;
 - (গ) কারখানায় উৎপাদিত চায়ের মান যাঁচাই এবং ক্ষুদ্র চা চাষীদের উৎপাদিত কাঁচা চা পাতার প্রতি বছর মূল্য প্রদান পদ্ধতি (Mode of Payment) নির্ধারণঃ
- তবে শর্ত থাকে যে, মান যাচাইয়ের জন্য ল্যাবরেটরী ও অনুরূপ ক্ষরচ কারখানা কর্তৃপক্ষকে বহন হইবে;
- (ঘ) কাঁচা চা পাতার মূল্য হইতে কৃষি ব্যাংকের ঋণ পরিশোধ পদ্ধতি নির্ধারণ;
 - (ঙ) কারখানা কর্তৃপক্ষ ও ক্ষুদ্র চা চাষী বা চা বাগান মালিকের মধ্যে চা পাতা ক্রয়-বিক্রয় সংক্রান্ত সম্পাদিতব্য চুক্তিপত্রের মেয়াদ ও শর্তাবলী নির্ধারণ;

- (৮) পরিবেশগত ছাড়পত্র গ্রহণের জন্য প্রণীত প্রাথমিক পরিবেশগত মীমাংসা (Initial Environmental Examination-IEE) প্রতিবেদন এবং প. শগত ছাড়পত্রের শর্ত মোতাবেক কারখানার দূষণ নিয়ন্ত্রণ এবং পরিবেশগত ব্যবস্থাপনা তদারকি;
- (৯) কারখানা কর্তৃপক্ষ কর্তৃক কাঁচা চা পাতা সংগ্রহ, কাঁচা চা পাতার মূল্য পরিশোধ, কারখানায় গুণগত মানসম্পন্ন চা তৈরী ও অনুরূপ চা বিক্রয় ইত্যাদি যাবতীয় বিষয়ে বোর্ড কর্তৃক জারীতব্য আদেশের বিষয়ে, বোর্ডকে প্রয়োজনীয় সুপারিশ প্রদান।

৯। কারখানা কর্তৃপক্ষের কার্যক্রম।—(১) কারখানা কর্তৃপক্ষ তদ্ব্যবধায়ক কমিটি কর্তৃক নির্ধারিত মূল্যে ক্ষুদ্র চা চাষী বা কারখানাবিহীন চা বাগানসমূহের উৎপাদিত কাঁচা চা পাতা ক্রয় করিয়া কারখানায় প্রক্রিয়াজাত করিবে।

(২) কারখানা কর্তৃপক্ষ, কমিটি কর্তৃক নির্ধারিত পদ্ধতিতে, চা চাষীদিগকে ক্রয়কৃত চা পাতার মূল্য প্রদান করিবে।

(৩) কারখানা কর্তৃপক্ষ কমিটি কর্তৃক নির্ধারিত স্থানসমূহ হইতে নির্ধারিত তারিখে ক্ষুদ্র চা চাষী বা চা বাগানসমূহের উৎপাদিত কাঁচা চা পাতা যথাযথভাবে পরিমাপ করিয়া নিজস্ব পরিবহনের মাধ্যমে কারখানায় প্রেরণের ব্যবস্থা গ্রহণ করিবে।

(৪) কারখানা কর্তৃপক্ষ ক্ষুদ্র চা চাষী বা চা বাগানসমূহের কাঁচা চা পাতা কারখানায় প্রক্রিয়াজাত করিয়া উন্নতমানের চা প্রস্তুত করিবে।

(৫) কারখানা কর্তৃপক্ষ, কমিটি কর্তৃক নির্ধারিত শর্তে, ক্ষুদ্র চা চাষী বা চা বাগানসমূহের কর্তৃপক্ষের সহিত কাঁচা চা পাতা ক্রয়-বিক্রয় সংক্রান্ত পৃথক পৃথক চুক্তিপত্র সম্পাদন করিবে।

(৬) কারখানা কর্তৃপক্ষ কারখানায় প্রস্তুতকৃত চা বিক্রয় করিয়া বোর্ড ও সরকারের পাওনা কর, উপ-কর, ইত্যাদি যথাযথভাবে পরিশোধ করিবে।

(৭) কারখানা কর্তৃপক্ষ কাঁচা চা পাতা সংগ্রহ, কাঁচা পাতার মূল্য পরিশোধ, কারখানায় গুণগত মানসম্পন্ন চা তৈরী ও অনুরূপ চা বিক্রয় করা, ইত্যাদি যাবতীয় বিষয়ে, কমিটির সুপারিশের ভিত্তিতে, বোর্ড কর্তৃক জারিকৃত আদেশাবলী পালন করিবে।

(৮) কারখানা কর্তৃপক্ষ ক্ষুদ্র চা চাষীদের নিকট হইতে নিজস্ব উদ্যোগে কাঁচা চা পাতা সংগ্রহ করিবে এবং এই বিষয়ে সংশ্লিষ্ট কর্তৃপক্ষ উৎপাদনকারী কৃষকদের সহিত আলোচনা করিয়া একটি পদ্ধতি নির্ধারণ করিবে।

তবে শর্ত থাকে যে, যতদিন পর্যন্ত এই ধরনের পদ্ধতি গ্রহণ করা না যাইবে ততদিন পর্যন্ত কারখানার গেটে কাঁচা চা পাতা পৌঁছাইয়া দেওয়ার জন্য কৃষককে একটি যৌক্তিক পরিবহন ব্যয় প্রদান করিবে।

(৯) কারখানা কর্তৃপক্ষ কমিটি কর্তৃক নির্ধারিত কাঁচা চা পাতার মূল্য বাবদ প্রাপ্ত অর্থ হইতে ব্যাংকের ঋণ বাবদ পাওনা অর্থ কর্তন করিয়া অবশিষ্ট অর্থ সংশ্লিষ্ট কৃষকের হিসাবে তাৎক্ষণিকভাবে জমা করিবে।

১০। উৎপাদিত চা নিলাম।—বোর্ড কারখানায় উৎপাদিত চা এর নিলামের ব্যবস্থা নিশ্চিত করিবে।

রাষ্ট্রপতির আদেশক্রমে
নলিনী রঞ্জন বসাক
সিনিয়র সহকারী সচিব।

মোঃ নূর-নবী (উপ-সচিব), উপ-নিয়ন্ত্রক, বাংলাদেশ সরকারী মুদ্রণালয়, ঢাকা কর্তৃক মুদ্রিত।

মোঃ আমিন হুবেরী আলম, উপ-নিয়ন্ত্রক, বাংলাদেশ কবর ও প্রকাশনা অফিস,

তেজগাঁও, ঢাকা কর্তৃক প্রকাশিত।